

Дала лаърххІа Іийса дунен чу валар

1 Цу деношка Август цІи йолча паччахъа амар арадаьлар,
Рим-паччахъалкхе мел дола адам дІаязде аьнна. 2 Сири-областа
Куйриос доал деча юкъа, адамаш юхъанцахъа дІаяздеш дар цу хана.
3 Цудухъа хІара вар ше ваьннача шахъаре вахар дІаязвала. 4 Юсуп а
вахар Галилай мехкара Назарт-шахъарера ЯхІуд-мехка,
Дауд-паччахъ ваьча Байтлахам - шахъаре, хІана аьлча из Дауда
цІийх ваьнна вар. 5 Из шийн йиха ягІаш йолча, хІаьта берах йолча
Маремаца дІаязвала водаш вар. 6 Уж Байтлахаме болаш дезалхо
дунен чу валара йола ха тІакхаьчар. 7 Марема кІаьнк вир, ший
хъалхара дезалхо. Цо из дІа а хъоарчаваь шоаш чу болчу доахан
хъайчу виллар, хІана аьлча царна цІагІа моттиг кхаьча яцар. 8 Цу
мехка, ара бийсана, шоай доахан лорадеш Іуй бар. 9 ЦІаьхха царна
духъал Даьла Малейк Іоэттар, Везача Даьлера долча нурца уж
сийрда а боахаш. ЧІоагІа кхера белар Іуй. 10 Малейко аьлар царга:
«Кхера малелаш! Со шуга деррига адам доаккхий деш бола Хоза
кхаь бахъаш денад! 11 Тахан Дауда — шахъаре ваьв шу
кІалхъардоахаргдар, Дала лаърххІа, белгалваь вола Аьла. 12 Из
шоана вовзаргва укх белгалонах: дІа а хъоарчадаь бер корадергда
шоана хъайчу». 13 ЦІаьхха Малейка улув сиглара дукха малейкаш
дессар. Цар, Далла хоастам а беш, йохар: 14 «Сигаленашкахъ Далла
хоастам ба! Дуненчу Даьла раьза волча адамашта машар ба!» 15
Малейкаш сигал хъалдаьлча, Іуша шоайла аьлар: «Байтлахаме а
даха, цига фу хиннад хъажа деза вай, вайга Дала байтар фу хоам ба». 16
Уж цига сихонца бахар. Царна корабир Марем а, Юсуп а, хъайчу
уллаш бер а. 17 Бер бІарга дайча цар дийцар цунах шоашка бена
хиннача хоамах лаьца. 18 Массавар а, ладувхаш мел хиннар,
цецваьннавар Іуша дувцачох. 19 Бакъда Марема шийна мел хезар
ший дагахъ лоаттадора. 20 Іуй юха бийрзар, Далла хоастам а беш,
хІана аьлча царна хезар а дейнар а малейко аьннача бесса хилар.